

xini, de missier Batista, amico de dito signor, praticò de far liberar tuta la nation, è cussi prometeva dito signor far in modo, che l' andò la voze al soldan, el qual vuol esser cognosciuto lui per re; e uno zuoba, trovandosse i marchadanti, zoè armiragio de 1000 lanze, et entrò el signor di Alepo con l'horò. li disse el soldan: Che se die far di questi venetiani? Consegiate, se ti participi, nel regno i hano praticà con Suffi, nostro inimicho? El signor di Alepo e tutti li altri se amutino. El dì de 22 fevrer fezene chiamar tutti veniziani a la presentia del soldan, con el qual se atrovava tutti li armiragij, e poi chiamò, prima missier Piero Zen, consolo di Damasco, con quelli de la Suria; feze vegnir entro quel Nicolò Soror. Fo molte parole: missier Piero Zen era favorizato da tutti li armiragij, nisun non osa parlar; fo molto rebuffato ne la opposition del Suffi, *tandem* sdegnato el soldan, el mese in chadene sì lui consolo, come tutti li altri, e poi ne feze chiamar entro nui con i mie' marchadanti, et diseme: Non pol esser non abbi consegiato anche tu queste cosse; bufando per l' impeto et colora, prima feze meter li mie' merchadanti in cadena. Io, veramente, comandò non fosse tochado, e poi disse: Andati tutti de compagnia a cha' del Nadrachas, e fati el cor del soldan bon, altramente vi farò morir tutti, nè farò, più venetiani habitino in questo paexe. Venuti a casa, tutti in compagnia, se trovò el Nadrachas, Unbene Musse, e quello Benoet, basarini del soldan, i qual disse a nui, consuli: Intendete quello à dito el soldan, bisogno li faziati bon cuor, altramente non intravegnirà ben. Fo risposo, che nui avesamo a charo intender el cor del soldan, perchè, quanto era le forze nostre, fassimo volentiera, e cussi se partissemo. Da poi, zercha do' horre, vene el Nadrachas a casa de nui, pregassemo de aver una audientia secreta da dito soldan. A dì 3 del pasado, andassemo a una audientia, quasi secreta. Se lamentò el soldan che, a tempo che Tangavardin era a Venexia, li era stà promesso uno imbasador con molti presenti et altre cosse, come Tangavardin l' à intestado, dicendo, che el ne aveva fato capitoli a nui, el ne observava, e nui altri non observamo le uxanze antiche, concludendo che, se el se farave el suo cuor bon, *etiam* lui ne faria bon lui; *tamen* fino questa horra, ch' è ultimo de marzo, tutti stamo in chadene. Havemo determenà scriver a la illustrissima Signoria, perchè cognosce-mo esser necessario sia mandato de qui un imbasador, homo honorato, con presenti; chè, dicho, non siando homo degno, de gran condizion, de' nostri se faria pezo, perchè Tangavardin, che cognosse tutti,

faria l' offizio del diavolo in meter mal, per el qual, e da lui, è intravenuto ogni mal.

El consolo di chatelani, per chausa de l' armada, era in grandissima desdita, al presente è in gratia de questo soldan, per avèrli promesso *maria et montes*, e de fazende, e de legnami, artelarie et altro; e poi la nostra desdita, zoè infortune de li, che dicono pezo di quello che è, ne dà danno assai: Idio sia in nostro ajuto!

De le fazende sono stà fate, et molti todeschi sono venuti; hanno levato bona quantità de spezie a Venexia, ho inteso *etc.*

De qui spezie ne resona assai; ogni zorno habiamo aviso, esser zonti navilij al Ziden, et Altor, *etiam* de qui, de tute sorte.

Spero, se le cosse de qui se asesta, se farano bene. *Item*, si have nova de l' India, come a le marine da Bol havea, in una fiumara, quel signor preso, cui dize 18, cui 21, charavella di portogesi. Se dize-no, tal nova esser certa, et aver morti li homeni. È venuto nova de qui, el Soffi aver fato cosse assai a le bande de Tartaria, et mandar a donar al turcho e al signor soldan algune spoglie, in confirmation de sua vitoria *etc.*

Sumario di una letera di sier Piero Zen, consolo a Damasco, drizata a sier Nicolò Venier, quondam sier Hironimo e compagni, data al Chayro, a dì 4 april 1510, et ricevuta a Venexia, a dì 14 zugno 1510.

Magnifici fratres.

Benchè le occupation mie sia grande in questi tanti travagli, perhò non ho voluto restar de far questa, per servar l' officio de la servitù mia versso vuj. La causa del nostro venir de qui l' avereti inteso, per le mie, scripture a la illustrissima Signoria, che dove se sperava ogni bene, zonto el consolo de Alexandria, perchè cusi ne scrisse Mobedim, fu l' oposito. Or, de qui zonto, ebi una audientia, a dì XI zener; a dì 23 fevrer la seconda, e a dì 3 marzo la terza. In le duo prime, sempre con lamentazion, che non li fosse dato aviso de quel zonzer de' ambadorj del Sophi de li, che non è stato officio de amici; et a me, che essendo pasati per Damasco, Aleppo, Tripoli, non li habia dato aviso; et, a la prima audientia, me feze lezer una deposition fata per quel Nicolò Soror, che fo trovato al Bir, con le lettere del Sophi, la qual dizeva, che io avi ricomandati li messi del Sophi a la illustrissima Signoria, e de lezer quelle, insieme con lui, stati mandati a Ve-